

春
在
堂
禱
文

襍文六編補遺卷五

德清俞樾

吏部左侍郎許公墓志銘

光緒二十有六年十二月 天子下明詔雪三大臣冤
復其官三大臣者故兵部尙書徐公故吏部侍郎許公
故太常寺卿袁公也三公皆蒙難於生前而得直於身
後於是天下之人皆頌 天子明聖而交口稱三公之
賢曰忠臣忠臣無異辭徐公之葬也余旣銘其墓矣今
年夏許公之子鼎鈞又具狀以墓銘請余舊史氏也將
上以宣布 朝廷盛德而下使爲人臣者知事久論定

屈於一時者必申於萬世而士大夫之氣將爲之一振然則斯銘也誼固不得而辭按狀公諱景澄字竹筠浙江嘉興人許氏曾祖溶祖國楨本生祖廷梧父丙煊皆贈如公官公自幼敏達年十五入縣學粵賊之亂奉祖父母及父母避難鄉間卒不廢學亂定復歸應歲科試補廩膳額同治六年舉於鄉明年成進士改庶吉士十年散館授編修光緒元年充順天鄉試同考官五年充四川鄉試副考官公初工爲駢儷之文及旣入翰林以時事方艱詞臣清要非可徒以詞章塞責乃究心朝章國故及時政利弊冀有用於當世長白相國文文忠

公器之以使才薦遂有出使日本之命丁父艱未赴
服闋升侍講十年充出使法德義和奧各國大臣時
國家方創興海軍前使者於德國訂購鐵甲船二穹甲
快船一皆未就公與譯員等歷游船廠講求船制又增
購穹甲快船一船之精良勝於舊制者十有五事又上
疏言大沽口宜設鐵甲礮船膠州灣宜定爲海軍屯塹
皆海防要策也俄丁母憂歸歸而粵督南皮張公公之
座師也招至粵與商榷時政後張公奏定蘆漢鐵路章
程皆公所參定也十六年又充出使俄德奧和各國大
臣俄兵游獵每涉我國所屬帕米耳之界公爭之俄外

部始已又議定界執舊議以烏什別里山爲界從此而南屬中國從此而西南屬俄國俄人則欲以薩雷闊勒爲界相持三載公堅執不撓俄外部乃爲調停之說帕界未定以前兩國各不得進兵以保和好雖界議猶懸而俄害稍戢公之力也時公已由太僕寺少卿通政司副使光祿寺少卿迭遷至內閣學士擢補工部右侍郎駐俄六載矣會俄國與日本開戰及事定而俄德法三國出而預謀使日人歸遼東於我人皆以爲喜公曰俄人懷自便之謀德人挾責報之意自此以往事故滋多矣吾懼不勝任力求代又言俄德兩大國交涉事繁一

使不能兼顧宜分爲兩使二十二年十一月 命公爲
德國使臣蓋不允其求退之請而從其分使之議也未
受代以前有鐵路公司之役俄國悉畢里鐵路欲與海
參崴連謀取道黑龍江吉林 朝議拒之因改爲商辦
設立公司而使中國亦入股銀五百萬乃又命公總辦
黑龍江吉林鐵路公司公力阻其路綫南侵且與訂約
稽查運料之船勿使漏稅而公司例支之公費悉數咨
存總署銖銖勿受二十三年至德國甫數月而俄人租
我旅順口 命公以頭等欽差會同駐俄使臣侍郎楊
公就俄都定議事竣公請病假回嘉興原籍溯自光緒

十六年使俄至是年入閏春秋鬢髮蒼然白矣時事日
非一身將老每一念之悽然泣下故鄉親故皆勸公可
勿出然公自以受 恩身重以身許 國不爲身謀適
奉樞電促行慨然就道此行也固已置死生於度外矣
既至京師 命在總理衙門行走兼署禮部右侍郎調
吏部左侍郎時意大利要素我三門灣政府趨趨未決
公抗言駁之事乃寢外國公使駐我京城者率驕不可
制自公入譯署稍稍斂戢羣公皆倚爲重然亦有忌且
忤者無何而拳匪之禍起拳匪者起自山東蔓延幾輔
朝廷始議勦之而東撫毓賢言其可用諸勲貴皆爲

煽惑招之入京以扶清滅洋爲名殺使臣攻使館公力
言拳匪不足恃外釁不可啟與太常袁公聯名入諫諸
首禍者深嫉之七月朔各國聯軍逼近都門而李秉衡
又倡言非殺主和者將何以戰越二日壬寅公與袁公
遂同及於難天下冤之是月十七日兵部尙書徐公亦
就西市未幾而聯軍入京 乘輿出狩嗚呼言之痛矣
今雖是非大定沈冤昭雪然使當日早從公言何至於
此此海內忠義之士所以太息痛恨於端剛諸人也公
所著有奏議及外國師船表德國陸軍紀略餘皆燬於
兵火其出使函稿則有石印本行於世公初娶沈繼配

高並封夫人子嗣仲維源維品維良皆早殤以從子嗣
卽鼎鈞也 朝廷旌公之忠加 恩其孤特用直隸州
知州今官湖北余旣諾鼎鈞之請乃撰次其事而繫以
銘銘曰

維三忠之同盡實千古所深悲賴 聖明之昭雪身雖
死而名垂公久勞於域外周四國而咸知當事變之猝
發宜於公平諏咨衆昏昏而醉矣公侃侃而爭之旣枘
鑿之不合甘九死其如飴慨劫運之莫挽幸 天鑒之
無私爰光復其名位更盪滌其瑕疵播榮名於史策垂
福祚於鍾虞旣表揚乎旣往亦風勵乎來茲苟無虧乎

堅白夫何慮乎磷淄願百爾之君子其三復此銘詞
都察院左副都御史薛公墓志銘

公諱福辰字振美號撫屏薛氏其始祖皞宋翰林承旨
世居江陰傳七世而徙無錫賓雁里遂爲江蘇無錫縣
人曾祖葆光早卒祖錦堂常州府學生父湘道光二十
五年進士有文名其會試卷海內傳誦焉官至廣西潯
州府知府三代皆以公貴贈光祿大夫曾祖妣許祖妣
顧妣顧皆贈一品夫人公昆弟六人仲弟福同同治六
年舉人次福成同治六年副貢生官至都察院左副都
御史次福保以奇才徵官至四川知府次福祚由恩貢

生官至湖北沔陽州知州次福庚光緒元年舉人一門之內翬然騫舉有荀龍賈虎之目而公最居長童稚時卽孝於親睦於羣弟潯州君奇愛之旣長遂博覽經史旁通諸子百家兼習素問靈樞之說蓋公一生學業源於此矣咸豐五年應順天鄉試中式第二名故事順天試必以北人爲元其第二必南人所謂南元也公以南元應禮部試文名滿都下僉謂潯州君之子家學固宜爾也榜發不與乃以議敘員外郎掣籤分工部在營繕司行走雖循分供職不自表襮而風采隱然羣公皆器重之是時潯州君方官湖南安福縣而母顧太夫人猶

家居公時以爲念爰以八年春乞假歸省既至又至楚
省其父而潯州君適由安福移知新甯以守城禦賊功
超遷知府俄拜潯州之命未及之官積勞成疾謝賓客
於新甯公扶柩歸而兵戈載道閒關繞越九年五月始
至於無錫無錫亦孔道也其明年卜地仁村將營窀穸
而大營潰常州陷顧太夫人率家人輩倉卒避寇命君
與副憲君留治葬事出入賊中危險萬狀葬畢偵知太
夫人在寶應將往從之北行至寺頭鎮猝爲賊所得公
神氣不變談吐甚豪詭詞謾語賊不能測竟縱之去得
免於難既至寶應又偕副憲君謁曾文正公於皖省陳

規復江左之策文正偉之而公自以家督宜在家奉母
教諸弟乃留副憲君於營中而自乞歸歸則謹視太夫
人寢饋又課諸弟讀書無復出之意李文忠之勦擒也
曾聘之入幕擒平又乞還蓋公篤於孝弟而澹於榮利
天性然也及丁文誠公撫山東以山東吏治積不修河
患尤亟非公不能佐理手書敦請至再至三公感其知
遇勉爲一行旣至先治河決躬駐侯家林日夜履行河
干相度機宜未及浹旬決口告合節省帑金百數十萬
文誠嘉焉飛章入告 詔授山東濟東泰武臨道異數
也東省當兵燹之後又困於水患公專務休養生息在

任四年困者以蘇瘠者以肥是大有造於海岱間矣光緒二年太夫人卒於署諸大吏知義不可留相與太息而父老之攀轅卧轍者以數千百計則公之爲政可知也五年服闋將赴闕謂諸弟曰吾自此以身許國矣明年行至天津會慈禧皇太后以宵旰憂勤起居弗怡詔徵天下通知醫理者李文忠公曾忠襄公交章薦公公入請脈處方語皆稱旨故雖簡放廣東雷瓊遺缺道又調督糧道均留內廷未赴也皇太后嘗面諭諸醫曰汝謂予可安養乎治天下誠不易任大責重曷敢稍自暇逸惟薛福辰讀書人當能體此意

公聞之悚然蓋君之素行固已默契 聖心矣九年春

皇太后大安諸醫皆退公亦調授直隸通永道

賞加頭品頂戴優之也公治畿南如治山左會越南用
兵兵差不絕特設官車局以紓民力民尤便之通永道
駐通州距京師近時蒙 徵召 恩賚優渥十二年

遷順天府府尹謝 恩之日召對便殿 諭曰卿非但
能醫病實醫國之才也 賜御筆職業脩明匾額又賜

御製一聯云敬謹身修葵向日光明心事月當天舉

朝贊歎以爲榮遇十三年冬調宗人府府丞十四年冬
授都察院左副都御史而公忽得半身不仁之病疏請

開缺不許十五年夏三疏乞退於是優詔俞焉遣御

醫視疾并賜茯苓瀕行賜御書福壽字及歲歲平

安四字皇太后又賜一聯曰人游霽月光風表家

在廉泉讓水間恩禮始終海內榮之是年七月戊寅

卒於里第遺疏聞諭照一品例賜卹又賁帑金治

其喪年五十有八所著有青萍閣文集又有風勞臆隔

四種醫經未及寫定世以爲惜元配王繼配樊又繼配

寶並封一品夫人子邦彥出爲從兄後襲雲騎尉世職

邦襄廕生安徽合肥縣知縣邦蘇由刑部主事官浙江

知府邦藩三品銜候選知府女子子三次女殤長適何

剛德三適李經湘孫八人育麒育麟育虎育龍育驥育
彪育楚育藍孫女四光緒十五年某月某甲子葬於漆
塘之原王樊兩夫人耐焉禮也其孤具狀乞銘銘曰
公篤於行顏閔之倫公長於政襲黃其人又精於醫爲
軒岐之功臣上以契乎 聖下以孚乎民宜其位躋槐
列而名勳楓宸惟漆塘之新阡君於此乎歸真地闕吉
壤 天錫恩綸 賜祭 賜葬世戴 皇仁闕佳城其
永固刊貞石以常新

江蘇候補道錢君墓志銘

光緒三十年二月甲戌江蘇補用道錢君卒余於其先

德子方先生同歲生也故習於君知君最詳謹循舊史
氏之職爲君作家傳一篇未幾而其孤振聲又來告曰
日月有時將葬矣請誌其墓余謂傳體宜載其詳誌體
宜舉其大乃譜其世系叙其出處綜其行誼考其政績
紀其生卒年月附及妻妾子女而繫以銘其世系曰君
諱志澄字伊甫亦字清士浙江嘉興人錢氏其先海鹽
何氏也明初有諱裕者育於錢故氏錢後由海鹽徙嘉
興故籍嘉興乾隆名臣有諡文端者其五世祖也曾祖
復厯官福建直隸知縣終順天府大興縣祖友泗天文
生本生祖泰吉廩膳生海甯州學訓導父炳森道光二

十四年舉人景山官學教習三世皆以叔父諱應溥者
官工部尚書而君又以道員例得加級請封故皆贈一
品曾祖妣陳沈本生祖妣胡妣鄭皆一品夫人其出處
曰君屢應省試不得意時方多故慨然有用世之志乃
納貲以知縣分發江蘇歷充洋務局上海糖捐局員歷
宰荆溪鎮洋青浦各縣所至皆治光緒二十一年過班
爲候補道仍發江蘇有旨交軍機處記名遇缺請 旨
簡放旋代理蘇州關監督代統鹽捕營督辦蘇屬沙洲
事督辦松滬釐捐其行誼曰君少有至性父教習君患
寒疾君旦夕叩禱時方九歲耳嘗讀書於叔父司空公

雜文補遺卷五

盜定額君悉照賦役全書頒示科則至今循之青浦所屬唐家浜大火君聞報馳往按戶振恤不假手胥吏其地卑下恒苦水災君爲築圩隄疏溝洫自是水不爲災又地近太湖太湖之盜時時闖入君力請上游撥兵助捕請而未允以去就爭之自是境內無盜長於折獄嘗言吾曾祖大興公有錢一堂之稱謂其無留獄也吾雖不才竊慕之矣嘗獲積盜陳達綬等八人盜自言曾行劫於某縣某縣移問知縣皆曰盜已獲案已定公細覈之實陳等所爲也乃提各縣所獲之盜來訊之則皆承再三詰之惟自視諸捕麾諸捕去乃泣請驗其足蓋足

指皆脫矣始知諸捕貪賞刑逼教供非真盜也使非君
平反不皆無罪而就死乎荆溪有客民陳殷二姓爭爲
棚長殷自殺其族兄以誣陳君察陳無懼色殷無戚容
細鞠之殷詞窮發其橐而血刃見案遂定江都民奚姓
丹徒姚姓爭沙田聚而鬪君躬自履勘曰其地實屬丹
徒然姚姓雖具稟承買而價未繳足且未升科完賦奚
雖升科完賦而價亦未足且買在姚後又地非江都隔
縣串買有違 功令兩姓皆有罪姑從寬勿究以東西
分界東歸姚而西歸奚六七年未決之案一言而決君
之精敏類如此至論與外人交涉則有二言曰平日推

誠臨時據理代理關督時有洋商欲於租界外購地者
君據新約以爭執不可且上書兩院曰蘇州開埠自日
本創始尙須明定界限而援例之國乃欲旁爭界外之
權非特無以對日本且隄防一決枝節叢生流弊何所
底止書上總督劉忠誠公深韙其言任公道銘曾疏言
君有血性而無僞行光緒十二年大計中丞崧公以君
勤直明爽果敢有爲列君上考皆可謂深知君者矣其
生卒年月曰君生於道光二十六年二月二十一日卒
於光緒三十年二月二十五日年五十有九妻蕭氏
封一品夫人篋室孫氏 貤封淑人君歿之三日賦絕

命詩四章仰藥以殉 旌如例子一人振聲也嘉興縣
學廩貢生江蘇試用道孫七人倬太學生候選州同傷
價殤侑健侗徹幼孫女三人其長者適長洲張氏君嘗
卜吉壤於海鹽祖塋之鄰地曰風聲甚至是振聲奉而
葬也遵遺命也其銘曰

禾中望旌實惟錢氏英英錢君乃杞乃梓負翰苑才以
貲郎仕宦游三吳厯宰百里一片赤誠愛民如子羣公
交薦循聲大起 天子曰才汝觀察使乃駕廉車重
游吳市整軍軍整理財財理遠人來游距我尺咫據理
不阿推誠毋詭經界一定狡謀自弭以君之才以才之

美如日方升未見其止如何不弔一朝逝水壘我圭璋
獨我蘭芷我作銘詞千載斯視下奠幽宮上告良史

游擊張君墓碑

往者大盜起於粵西蔓延於東南各行省而江蘇浙江
實終受其毒蘇則江南北郡縣皆陷惟存上海一縣浙
則浙東西郡縣皆陷惟存衢州一郡厥後李文忠之師
自上海入左文襄之師自衢州入而蘇與浙先後克復
天若留此一州一縣爲克復江浙之始基而遂爲中興
一大關鍵碩果不食豈偶然哉上海爲通商口岸江櫓
海艤南北往來衣冠駢集守滬之功人人樂道之當時

有功於滬者生享榮名而歿膺崇祀蓋非一人矣衢州僻處浙東游其地者尅知其事者希其事同也其功同也數十年來若有顯晦之殊此吾所以大書張君之碑也君諱培基字厚甫雲南呈貢縣人以武生應道光二十四年恩科武鄉試中式舉人三十年兵部掣籤以衛千總發南漕又由漕督籤分浙江海甯所此君仕浙之始咸豐六年會試成進士奉旨以衛守備歸部銓選請假回籍繞道浙中衢嚴鎮饒公留君辦衛防營務自是君之戰績皆在浙矣積功以衛守備擢營守備由守備擢都司賞藍翎旋換花翎累保至參將疊次署

理處州中營游擊湖州協副將甯海營參將撫標中軍
參將代理鎮海營參將又屢奉檄管帶湖屬泗安鎮駐
防管帶湘軍水師左營一時勲望翕然僉謂建牙專閩
指顧閒矣乃因保獎遊擊時漏敘銜名奉部文改以游
擊留浙補用而君之官階乃止於游擊知君者咸以爲
惜君不計也最君一生戰績在衢爲多衢之爲郡居浙
上流安徽江西福建廣東皆取道乎此固浙東一門戶
也賊窺浙東久故攻衢尤力君之仕浙也本以留辦衢
防營務故賊三攻衢君三守之在城文武如李公定太
饒公定選吳公艾生吳公來鴻皆與有勞績而始終其

事心力交瘁君一人也其時兵力單薄糧餉支絀君惟以忠義激勵將士賊於西門外饅頭山隧地攻城君倣古夔聽之法穴地丈餘坐瞽者於大坵使之諦聽審定所在掘濠引水灌注其中賊謀遂敗金衢嚴道胡公命公統全勝營水師駐衢西門外賊自常山擄民船百餘順流而下君逆擊之賊大敗棄船走是時援衢諸軍雲集而城西南隅則惟倚君水師爲重湘軍至衢圍解君又隨同克復嚴州金華淳安蘭溪湯溪龍游常山諸郡縣其戰於威坪也以師船六艘擊退悍賊二萬尤爲軍中所矜服使當日非君與衢城文武同心固守則衢城

必陷衢陷則浙東糜爛湘軍轉戰而下非旦夕可期而肅清全浙不知何日矣事在一隅功關大局守衢守滬伐閩惟均而守滬猶借重洋兵守衢則惟資血戰其功雖等其事尤難也軍事輟定君乃捐廉俸施醫藥物故者棺之櫓之嬰兒者餵之乳之於崎嶇百戰之餘爲休養生息之計君其材兼文武者歟光緒十七年歿於烏鎮水師營次 詔視副將及三四品官出征病故例賜卹予一子八品蔭生異數也嗣由衢郡紳民厯陳其守衢之功請附祀左文襄專祠由浙撫入告從之百戰之功千秋俎豆公論也亦異數也公長子某早卒次子

善友余門下士也以君之墓宜有碑碑宜有銘具狀而請於余余惟君之一生莫大於守衢故舉此以曝示後人餘從略焉碑例然也銘曰

盜起桂嶺東南爲墟旋乾轉坤孰爲之樞在蘇惟滬在浙惟衢衢城巖巖浙東門戶三攻三守臣力師武厥功孰多張君厚甫滇雲潏潏是生將材滇土如林君爲之魁仗劍從戎萬里而來我舉於鄉與君同歲我游於杭與君把臂大樹俄摧長城焉寄俎豆百世窀穸千年祁連高家鬱鬱芊芊舉其大者銘勒其阡

贈光祿大夫候選道朱君墓碑

故三品銜一品封候選道朱君德立於身行修於家利澤及乎鄉里名譽達於朝廷歿已三十年而父老謳思士林稱道至今不衰爰有搢紳先生潘君學祖等百有餘人臚舉君一生事實呈學牒縣達於臺司安徽巡撫聶公乃會同總督學政合言於朝請以故紳朱某入祀鄉賢祠天子下其事於禮部部議上如所請而君俎豆千秋矣君有賢孫念陶觀察宦游江蘇言於余曰故事三品以上墓必有碑今吾祖葬久矣而墓碑未具禮則有闕用敢具狀有請余受而讀之歎曰斯人也古所謂鄉先生歿而可祀於社者也謹按狀君諱宗濤

字虞廷別字雅庵安徽涇縣人朱氏曾祖安池祖萃父
鑿皆以商業世其家君幼失母父奇愛之謂非常兒也
年十五卽服賈於外遂精於廢舉之術曾文正公方整
頓淮鹽以裕軍食君承辦西鄂兩岸鹽引是時江漢閒
寇亂未平傾側擾攘棘荆徧地而君舟車四出履險如
夷其材智過人亦可見矣江西以軍饟奇絀議倡辦釐
捐未有端緒乃以屬君君之治釐也無擾於商而捐則
大集涓滴不以自私雖薪水之資亦謝不受人皆稱焉
金陵平敘功由候選同知升知府加道銜 賜孔雀翎
然君無意仕進旋入貲以雙月道候選加三品銜曰吾

以布衣起家官四品銜三品是亦足矣尙何求乎君居家以孝友聞因幼失母育於庶母聞人言亡母事輒涕泣事父與庶母咸竭力逢忌日終日不食與兩弟友愛無閒人莫知其爲異母昆弟也君旣淡於榮利又篤於天性故一生無他務一以濟人利物爲事族中故有師范堂義倉兵亂毀焉君捐貲設繼范堂以周濟貧苦歲費銀千兩有奇三十年來不下四萬兩其後君之諸子臧成等遵其遺命買南陵縣田一千六百餘畝創建義莊成君志也族中又有義學乃其五世祖諱武勲者所創亂後亦廢君復設之又出鉅貲生息自應童試以至

鄉會試咸有助一時造就甚衆邑中文廟毀於兵火以四千餘金助修又獨修鄉賢祠今崇祀鄉賢亦其報也同治三年江南補行鄉試上江假江甯察院爲公所君助以經費每語諸子凡事關庠序必宜贊成其後邑人議建復考棚臧成等獨任其事糜白金至二萬有奇及奉 旨設學堂又捐三千金爲倡皆所以成君志也君自奉甚儉每歲所入悉以施舍修葺橋梁平治道塗收育嬰倪撫卹孤寡寒則施衣病則施藥見義必爲不分畛域常於江西省城進賢門外買地以瘞旅櫬命之曰同義堂又於湖北漢陽城外添置救生紅船一艘行

旅感焉而君猶以力薄不能博施易簣之日猶語及之
故諸子莫不感奮光緒十二年遵遺命捐振直隸水災
一千兩 詔爲該故紳建樂善好施坊十八年又捐振
直隸七千兩 詔將該故紳善行列入原籍省府縣志
君先以耀成官請從一品封及考棚成撫臣以聞言本
其父遺意 詔賜正一品封至是又崇祀鄉賢嗚呼是
足以表示乎後世而庇蔭其子孫矣君生於道光二年
某月某甲子卒於同治十三年十二月某甲子年五十
有三娶唐氏贈一品夫人側室熊 封夫人章 封宜
人子八人瑞元同治六年副榜貢生湖北候補同知蔚

成殤燿成浙江候補道麟成江蘇候補道臧成候選道
陽生庚年均早卒震江西候補道孫二十二人曾孫十
一人元孫一人余於諸孫中識其一曰錕光緒十四年
舉人江蘇候補道卽念陶觀察也余旣諾其請乃文其
碑乃繫以銘銘曰

君之內行粹然君子孝乎惟孝友于兄弟君之外才靡
任弗勝出其餘技用佐中興君之天性澹於利祿我行
我素爲善最樂橋傾我建塗圯我修孰饑我餽孰病我
瘳乃興義學義學有塾乃立義倉義倉有穀君願孔巨
君志不墮力或未逮有子成之疆吏上言凡茲義舉父

命子承承其先緒 天子曰咨宜旌其門樂善好施垂
裕後昆 天子曰咨晉爾一品錫之章服服我休命君
之遠祖實祀鄉賢五世之後而君繼焉令聞令望世世
無斁我作銘詞刻君墓石

嘉興移建節孝祠碑

國家旌別淑慝風示天下匹夫匹婦一節之善咸予褒
揚故凡婦女之青年守志白首完貞者生則有綽楔之
榮歿則有俎豆之奉此郡縣節孝祠所由立也浙江嘉
興縣故有節孝祠在郡城東門外角里街亂後毀焉撤
揭經營粗復其舊然其地舊爲通衢今爲曠野彌望荆

榛四無鄰比守者無可棲止宵人得以潛藏門牖窗櫺
任意毀折祠中栗主斧以爲薪佳節春秋無以奉祀行
路見者咸爲盡傷於是邑人聚謀僉曰是宜徙於城內
乃卜吉地得於分府公廨之東蓋關廟之故址也則有
尼之者曰是地也屬於秀水今以嘉興貞孝祠移建於
秀水之地無乃不可乎然考嘉興爲孫吳古縣至明代
始分置秀水是嘉興秀水古本不分況嘉邑之壇廟祠
宇在秀水境內者甚多何獨於節孝祠而疑之紳士大
夫合詞請於嘉興縣吳公秀水縣程公皆以爲然嚴禁
沮撓獎成其事然後遷祠之議乃克有成矧工庀材將

謀經始而又有難者此一舉也非白金三千兩不辦嘉
邑雖號富衍而生齒日繁生計日絀集貲於人銖累而
寸積殊非易易爰有故布政司銜記名道訪梅姚公文
枌之簞室 諸封宜人劉宜人者巾幗中樂善好義者
也慨然曰節孝祠之建所以慰旣逝之窮嫠而資將來
之觀感此亦邑中一大事奈何猶猶與與不速圖其成
乎費無所出吾請獨任之乃捐金三千兩卜日興工邑
人皆大感奮踴躍從事始某年月日訖某年日月祠工
一律告成木事土事無不胥飾雕櫨鏤檻有加於前孫
桷母榱悉中程度落成之日式其祠下者咸嘆曰劉宜

人之力也余與聞其事樂觀其成用述本末紀之於碑
古碑必有銘銘曰

惟嘉興縣有節孝祠祠毀復建厥地非宜移建城中關
廟古基集腋匪易鳩工無期有命婦劉中嫺鬚眉白金
三千談笑出之成此美舉仗此鉅貲落成之日萬口嗟
咨宜有記載傳示來茲舊史俞樾作此銘詞

贈太傅封一等男文華殿大學士瓜爾佳文忠公墓志
銘

光緒二十九年三月庚子文華殿大學士榮公薨於位
是時 天子方奉 皇太后展謁 西陵

還

定遺疏聞

兩宮震悼贈太傅封一等男

予謚文忠賜祭一壇入祀賢良祠越日又賜祭

一壇命以生平事蹟宣付史館疊奉詔書一則曰

盡心竭力調和中外再則曰獻納周詳爲中外所不及
知天語褒揚舉朝讚歎嗚呼公不死矣日月有時將
舉大葬公子席卿介河南巡撫陳君乞余銘其幽宮余
名微位卑不稱盛德辭焉辭不獲命乃譜其世系敘其
出處綜其行誼紀其生卒及其所生而後舉其卓卓大
者著於篇繫以銘其世系曰公諱榮祿字仲華別字略
園姓瓜爾佳氏滿州正黃旗人其先世有諱費英東者

實佐

太祖高皇帝締造丕基順治初封直義信

勇公所謂四字公也元勲懿戚代有聞人祖莊毅公諱塔斯哈以幫辦大臣歿於喀什噶爾之役 詔視都

統例賜卹父勤勇公諱長壽涼州鎮總兵咸豐初與兄天津鎮總兵武壯公諱長瑞者同日戰歿於廣西

詔有忠貞世篤之褒均贈提督卹如例而其季弟諱長泰者又以游擊隨科爾沁忠親王轉戰畿輔歿於陣公官工部員外郎時曾被 命至軍機處問祖父死事

狀公具以對

文宗顯皇帝動容久之公後著有

忠貞世篤錄紀此事也其出處曰公以門蔭起家觀政

工部擢員外郎筦銀庫事俄請以道員候選及

顯廟狩木蘭恭忠親王設立巡防處檄公總其事同治
元年 醇賢親王又調公充神機營翼長奉天馬賊逼
近 東陵公統健銳營追賊鐵門關賊遁加副都

統銜七年復設巡防處公亦與焉捻平論功加頭品頂
戴擢左翼總兵授總管內務府大臣工部戶部侍郎光
緒四年授步軍統領工部尚書未幾謝病歸病起授都
統 簡放西安將軍二十年海疆事起復授步軍統領
會辦軍務和議定授總理各國事務大臣二十二年以
兵部尚書協辦大學士二十四年四月授直隸總督八

月 特授軍機大臣是年始設武衛五軍以公總中軍兼節制各軍晉文淵閣大學士二十六年轉文華殿大學士以終其行誼曰公生有至性少孤孝於繼母友於昆弟及壯長身玉立儀狀偉然官部曹時每常朝倬直顯廟於班中遙望之輒指問樞臣曰此榮祿耶

是時當國者權勢熏炙欲羅致門下公不爲屈其請改道員緣此也 今上登極敘定策功以執金吾拜大司空浸大用矣而引疾乞身優游家術者十餘年海內高之公爲西安將軍以駐防軍生計奇絀孤寡者名糧之外月給錢千一軍歡抃乃使練習洋槍以佐騎射軍

容爲之一振及任兵部尙書遂疏請武科改試槍礮又請設武備學堂以畜將材其時朝廷方病八股取士不足得實學公乃建言非設學堂不可於是京師設立大學堂又推其法行於各直省皆由公始也 兩

宮之西狩也各國索戎首甚亟公力陳安危所繫請早定大計以安 宗社罪人旣得外論始平公與兩

全權大臣往復函商以定和議人知慶邸與李文忠之樁柱於外不知由公之斡旋於內也公在行在卽議立政務處凡因革損益之事取裁於此至今循之規模猶矣少負文武才書畫劍槊皆極其妙及敷歷中外與文

文忠寶文靖李文正左文襄李文忠諸公互相砥礪不
立崖岸而外省情弊無不周知與各疆臣推誠告誡人
人樂其寬易而又畏其嚴明誠一代名臣也其生卒曰
公生於道光二十三年某月某日薨年六十有一當疾
革時問以家事不答喃喃嚙語皆 國大事也睽懷

君國始終不渝謚之曰忠允矣元配某氏繼配宗室
氏故大學士諱靈桂之女有賢行庚子歲從公西行以
疾卒於河南彰德府側室某氏以女貴奉 懿旨

封一品夫人子綸厚字少華亦從公西行時年甫十四
事起食卒眾皆惶遽摒擋衣物綸厚獨奉持先世遺像

及世傳寶刀以行公聞而嘉之俄亦以疾卒乃以昆弟
之子良揆爲嗣卽席卿也公歿後 詔以四品京堂候
補女子子二一適禮親王世子一爲醇親王福晉最公
一生起家卽署醇登揆席持危扶顛功在 宗社

恭譚 聖諭有云獻納周詳中外不及知然則可得
而言者固已僅矣況余之跼伏草莽於外事罕聞見又
烏乎測之哉然而其舉卑大者則亦可得而言謹列其
數事曰方 穆宗毅皇帝之升遐也公以內務府

大臣與 御前軍機主大臣同被 顧命公獨額
請俟 今上生有皇子卽承嗣 穆宗感動

兩宮爲之揮涕未幾而果有吳可讀之疏疏入

嘉許蓋公言已先之矣此一大事也南海有不逞之徒挾其邪說煽惑人心朝野上下聳然動聽公獨不爲之惑擯斥姦回和調官府不動聲色措天下於泰山之安又一大事也 本朝鑒於前朝不立儲貳 歷聖

相傳從無異論往者諸臣創議建嗣名爲固本實則行私公力爭之雖不能得然所立不久而廢廢後不復更立從公言也又一大事也山左亂民恃其拳勇闖入京師啟釁外邦焚殺平民攻圍使館公屢言於 朝請勦亂黨勿替邦交而一時強宗悍將橫行恣睢幾使公無

從置喙公亦數瀕於危卒賴公言稍全大局又一大事也
和約既定 大駕東回行至汴梁暫休徒御而羣

情與與猶猶僉謀留 驛公毅然請行百端譬解於是

乘輿遂發復入都門萬眾瞻仰歡聲如雷遂以成萬
億年無疆之休又一大事也嗚呼昔郭沖於武侯記其
五事公亦當代之諸葛也存此數端以見崖略若夫次
弟其事始終本末巨細畢登則有國史在其銘曰

三台上相一代偉人雲漢輔轍雷雨經綸道臻其盛運
當其屯沐日浴月旋乾轉坤忠愛結 主樂易宜民三
軍慕義四裔歸仁愛善如渴燭姦若神大憝斯拔片長

補行咸豐十一年拔萃科君中其選逾年以 朝考第一授小京官分吏部一時耆宿咸推大器而君意殊未嫌益自攻苦屢應京兆試不售光緒九年君父大令公以疾去官僑居吳中君以官京師去親遠伯兄某已以大挑知縣分發江蘇君因亦以知府指分浙江蘇浙毘連便存省也時撫浙者爲仲良劉公知君才卽委辦廣信督銷局又調辦嘉興鹽釐局局事皆治俄以憂去服闋李文忠公 奏調直隸自是而君之治蹟皆在畿輔矣直隸重海防特設支應局李公以君充提調君整紛剔蠹剖豪晰釐人莫能欺而事無不舉時總持局務者

瀏陽李勤恪公也歎曰得汪君佐我我無憂矣分雖僚
屬而親若袍襪蓋局事皆取辦於君焉二十一年權知
易州直隸州州故多盜君不惜重賞廣設捕役捕其魁
殺之盜無所容民用安枕其明年過班以道員候補今
仁和相國暨榮文忠公先後督畿輔皆倚如左右手壽
山制軍裕公疏薦君才蒙 召見二次命遇缺卽補並
交軍機處存記二十六年姦民倡亂千百成羣號曰義
和團圻內震動君力言於裕公謂宜痛勦之公未能用
而語聞於外亂民遂與君爲讐猝率數十人闌入君寓
聲勢洶洶君挺身出嚴詞詰責膚色不撓衆皆隴種散

去及事平項城袁公總督直隸亦器重君先後委辦支應籌欸善後局務時兵燹之後文卷蕩然諸事草創焚如亂絲君在直久性又強識故能舉其都較一時有今事不知問崔琳之歎各局生息之欸無慮三百萬券據燬失過半君逐一考核罔有遺漏袁公嘉其力任勞怨公家之利知無不爲密陳於 朝謂可大用二十八年九月 簡授通永兵備道甫四日升補長蘆鹽運使君以亂後商力凋敝非恤商無以裕課請免宿課又籌借巨欸以資轉濟有議加竈鹽之價者君曰損下益上非所以培養元氣也力持不可然其時百廢待舉無不取

給於鹽君參定新章掃除積弊商不困而課日增一年
之後綜計庫儲贏於曩昔然後歎君以恤商爲裕課之
原洵知本矣直隸永平宣化兩屬產鹽極饒而除灤州
外向無官引聽民私販君曰是非政也銳意釐治量地
制宜或歸官辦或由商運無病於民有裨於國君之
克舉其職此一端也二十九年

兩宮展謁

西陵君隨辦大差夙夜不懈 詔以應升之缺用

恩賞福壽字兩方緞匹兩端異數也海內歎美僉謂封
疆節鉞計日可待明年夏忽奉解任之 命僚友莫知
其故君無一言惟自引咎而已袁公仍留君使駐德州

辦北洋機器局締造之初規模未定君訂章程籌經費
講求製造之法實事求是如平時不以身退而稍懈
然積勞數十年至是日益不支忽得類中之疾遂上書
大府求交卸局務并奏請開缺既得請由潞河南歸
竟於光緒三十一年八月丁卯卒於蘇寓年五十有七
未竟其用海內惜焉君性孝友篤於天倫父歿時有弱
弟尙幼君撫育之以至於成光緒二十三年弟登賢書
距君大父鄉舉之歲適甲子一周士林豔之又有從子
數輩皆卵翼於君今學成而仕者二人焉君嘗曰此皆
吾生平快意事及臨歿猶言之其孝友可見矣夫人陳

氏先君一年卒子二人駿孫三品蔭生士元光緒二十年舉人三十年進士江蘇補用道孫二人毓崧毓良皆幼駿孫等卜於光緒三十二年四月辛亥奉君與夫人合葬於蘇州胥門外米斗山之麓礧石乞銘余與君大父爲同歲生有累世通家之誼不敢以老病辭因撰次其事而繫以銘銘曰

奐矣汪君杞梓圭璋始仕於浙處事精祥五五旣闕改筮畿疆畿疆戔戔實惟北洋幕府大啟治具畢張君負長才可圓可方三刀小試盜賊潛藏羣公贊歎交馳薦章書名 御展奏對明光乃乘廉車乃總離綱鳳鸞翔

翥騏驎驪驤道無顯晦時有行藏位不副才海內悲傷
遠而有耀久而彌芳千載之下令名孔彰

贈光祿大夫清溪縣知縣陳公墓志銘

公諱忻煜字夢石一字葵鄉江西崇仁人陳氏元時有
諱泝之者學於吳草廬虞道園兩先生時稱鉅儒其先
所居曰東菴後遷北菴北菴陳氏遂爲著姓曾祖恩餘
祖光宙父萬勅三代皆以公貴贈如其官公六歲而孤
少有遠志克自勵於學旣壯以縣學生補餼額應道光
十一年鄉試中式舉人七試於禮部不得志至道光二
十四年年且四十九矣始以大挑一等得知縣分發貴

州貴州邊省吏治疲敝既至上游以公老成諳達頗器重之厯知龍里普安安南普定天柱諸縣補授清溪縣令署黔西州牧其爲政以扶植士類康濟民生爲主於書院諸生遇之至厚優其膏火之資教以讀書作文之法黔省人文爲之一振尤注意蒙學所至必廣設義塾每逢朔望傳集塾中子弟親爲講習以少儀弟子職諸書相助勉造就甚多道光二十九年咸豐二年兩充鄉試同考官所識拔皆耆宿其聽訟用古色聽氣聽之法不事鞭朴悉得其情爲牧令垂二十年未嘗妄笞一人也然察來占隱雖武健嚴酷之吏長目飛耳者遜

謝不如故吏人皆敬而畏之公固敦厚長者而一時稱廉能者必推君先後撫黔者如善化賀公長齡孝感喬公用遷侯官何公冠英皆極重其才引以商榷政治往往呼爲夢石先生而不稱其官益陽胡文忠公方守鎮遠安順諸郡每與論立身本末及治盜安民方法書函往復輒數千言見公所刊算過篇及防邊纂要歎曰吾安得如斯人者相助爲理乎其爲諸鉅公見重如此然公直而不阿不能遂飛遁走改難入鄭故不諧於俗咸豐中葉苗教交鬩黔中大亂幾無完郭而當事者輒以多殺邀功無辜小民橫被翦屠原野流血公喟然曰如

若所爲豈不立致通顯然 朝廷設官本爲民也不撫
綏之乃荼毒之吾能與共事乎會有股疾遂以疾乞歸
而是時南中猶未平熾火滿天欲歸不得故仍寓貴陽
每念金陵未復粵賊未滅雖在病中未嘗不太息泣下
也同治三年六月乙卯 王師克金陵巨憝殲南方定
而公卽於是日啓手足於黔寓之正寢不及聞矣年六
十有五公宦黔雖久廉吏也沒無餘資黔去江西又遠
公子等竟不能歸卽以貴陽籍應試及以舉人入都
功令必得同鄉官印結方許覆試而黔省諸京官無有
以異籍爲難者皆曰陳君之子也親愛之反過於鄉人

公長子嘗以事至龍里投宿逆旅適大兵過境室廬皆滿及問知爲公之子爭挽留之且爲言公治縣事稱道不衰嗚呼公之歿也諸子皆幼故公之治績莫得而詳然觀其遺愛之在民則其治績可知矣娶楊氏廉靜善治家公七赴公車無室家累二十年收令無內顧憂皆其力也無子側室姜生子二王生子一皆愛之如所生可謂賢矣卒於同治四年十月己亥年七十子夔麟光緒六年進士改翰林院庶吉士今官直隸永定河道夔麟光緒十一年拔貢生十七年舉人今官四川榮昌縣知縣夔龍光緒十二年進士今官河南巡撫麟與龍姜

出也麒麟王出也女子子若而人孫及孫女若而人不具
書公以夔龍官 贈光祿大夫振威將軍楊及姜皆
贈一品夫人某年月諸子葬公於貴陽東門外厥地曰
黃家井以狀乞銘銘曰

天下治平在得循吏一吏循良四封安救惟公宰黔黔
人咸喜大啟弦歌罕聞鞭箠吏拜神君民歌樂只逝水
不留清風未已一葬桐鄉便成梓里公之治行宜登
國史天之報施觀其後起我爲公銘未盡公美安得斯
人與謀上理寬征宜民正業造士內治克修外憂斯弭
四清永海以報 天子

襲一等肅毅侯李君墓志銘

相國李文忠公之薨於位也越五月而襲一等肅毅侯
仲彭君以毀卒事聞 天子憫焉 璽書褒美嘉其至
行 命以事實付國史館列入孝友傳而君之孝於是
千古矣烏呼相國文忠之謚 上所特予也仲彭君孝
子之名亦 上所親定也父子忠孝焜耀史策此 昭
代二百年來之盛事非李氏一家之私榮也旣歿踰年
其孤國杰等奉其喪葬於茅岡以狀乞銘按狀君諱經
述仲彭其字也安徽合肥人其先本許氏自江西來徙
家傳十世始從外家之姓而爲李氏曾祖諱殿華祖諱

文安曾祖妣裴祖妣李皆以文忠貴 贈如其官父卽
文忠公也公初娶於周早卒繼配趙氏生君於兄弟行
居次然文忠嫡子也故卒爲文忠後云李氏先世業農
君之祖始以進士起家官刑部郎中時粵寇已蔓衍東
南居鄉創辦團練以備戰守文忠之治淮軍由此肇之
也嗣後削平禍亂光輔中興勲業之盛海內戶知之可
無述矣君生有二齒祖母李夫人喜曰其父固亦如此
此子必肖其父稍長目炯炯有光曾文正公見之語文
忠曰公輔器也五歲就傅聰穎異常兒十二歲能爲擘
窠大事於舉子業不甚措意而爲之輒工尤工爲詩有

晚唐人筆意母趙夫人以文忠勤勞 王事無暇課子
故課之甚嚴有小過訶責不稍貸君亦自刻勵於學讀
書日盡數卷強識之功人不能及又以世受 國恩而
時方多故益勉爲有用之學於歷代史事興衰治亂之
源無不窮究 本朝掌故尤所講求雖裨官野史有裨
實用者亦參考無遺每論政治得失動中冑竅識者偉
焉年二十二於光緒十一年應江南鄉試中式舉人明
年以蔭生應 廷試內用刑部員外郎二十一年禮部
會試君已取中且在前列及發彌封主試者見君名輒
易去之蓋其時中東之釁已起朝議多與文忠齟齬也

君固不以爲意然以文忠權重中外恒以爲憂平時隨侍津門深自韜晦未嘗有所干預及東事之殷文忠日在危疑中言路沸騰參預帷幄者率遭抨擊而君超然無累及文忠使日本於馬關中刺客君卽擬奔赴而文忠旋定約而歸故不果二十二年文忠奉命歷聘歐亞諸邦朝廷念高年遠役有詔加君三品銜充參贊官俾得隨侍左右君膺茲異數適符素願相從數萬里寒煖食飲調護惟謹文忠得以一意折衝尊俎間君之力也二十六年山左亂民練習拳勇嘯聚醜類闖入都城馴至聯軍入寇兩聖蒙塵而文忠又拜全權之

命入京師與各國議和文忠久勞於外年垂八十當智
勇俱困之時爲君國兩全之計雖以平時威望卒使
遠人帖然咸服然臣力盡矣其年秋卧病於京師君天
性至孝當十一歲時母趙夫人病肝甚劇君與歸張氏
之妹各翦指肉和藥以進服之果瘳後趙夫人知而切
戒之始不敢復爲及趙夫人歿君每哭必眩仆文忠撫
之曰汝忘老父乎乃稍自抑制至是聞文忠病時方在
金陵趨入侍既至文忠病甚侍湯藥者五十餘日晝不
甘食夜不交睫文忠薨君欲以身殉家人環勸之始已
然每哭必喘每喘必汗焦肝灼肺形在神亡光緒二十

八年二月己未竟以毀卒天下惜之君性嚴重寡言笑
慎交游尤好施與初趙夫人自奉極儉而三黨貧乏周
卹甚至遇水旱偏災必力勸文忠廣籌溫拯之方天津
城內外善堂如林咸飲以巨貲君幼承母教周急濟無
惟力是視光緒二十二年廬州與太湖均大水以三千
金振二十三年湖北水災又本母遺命以千金振二十
七年安徽水災請於文忠撥銀十萬兩以振又自出萬
金爲倡募集二萬餘金修築無爲州隄至今父老猶稱
道勿置曰使吾儕生死而肉骨者李侯也論者謂以君
之才之德天子已使君襲文忠之爵異日以通侯襲

贊國事必能宏濟艱難恢張先業何造物者予之材而
不使竟其用歟君娶朱氏 封一品侯夫人生丈夫子
四國杰正一品蔭生戶部郎中國燕員外郎國煦國熊
並舉人往者趙夫人之葬也君卜地於合肥縣東鄉曰
夏小影其西二里許有吉壤曰茅岡君曰我死卽葬耳
今諸子葬君茅岡遵遺命也銘曰

惟忠惟孝同出一源天生孝子忠臣之門文忠之忠人
無閒言乃有令子孝哉閔騫生從萬里歿從九原 帝
嘉乃孝載錫之恩宣布史館表示黎元君雖逝矣名則
長存君才孔碩君德溫溫舉其大者餘弗其論茅岡之

阡宰樹軒軒刻此斯銘垂裕後昆

都察院左副都御史薛公神道碑

故都察院左副都御史薛公之葬也余既爲文以志之
刻石而葬其幽宮矣故事三品以上大員之墓其墓道
必有碑碑必有文於是其孤又以爲請余曰唐宋以來
志文碑文同出一手者殊不多見蓋他求乎而其孤固
以爲請余不獲辭因思墓志藏於幽者也墓碑表於外
者也是宜舉其大者以昭示來茲與墓志體例固自有
別乃爲譜其世系稽其出處敘其政績及其 恩遇述
其行誼與其學術紀其生卒下逮其所生而係以銘其

世系曰公姓薛氏諱福辰字振美號撫屏江蘇無錫人其始祖皞仕宋爲翰林承旨世居江陰傳七世而徙無錫賓雁里遂家焉曾祖世球早卒祖錦堂常州府學生父湘道光二十五年進士官至廣西潯州府知府三代皆以公貴贈光祿大夫曾祖妣許祖妣顧妣顧皆贈一品夫人公於兄弟行居長弟福同同治六年舉人次福成同治六年副貢生官至都察院左副都御史次福保以奇材徵官四川知府次福祁由恩貢生官湖北沔陽州知州次福庚光緒元年舉人兄弟六人並知名而一門兩副憲尤世所豔稱焉其出處曰公於咸豐五年應

順天鄉試中式第二名會試不第遂以議敘員外郎掣籤分工部在營繕司行走及丁文誠公之撫山東也以山東難治且有河患非公莫可佐理敦勸公行河工告蒧丁公專摺保薦特授山東濟東泰武臨道丁內艱歸服闋入都會慈禧皇太后不豫有詔徵醫李文忠公曾忠襄公交章薦公召入稱旨簡放廣東雷瓊遺缺道又調督糧道皆以供奉內廷不赴及皇太后大安調補直隸通永道賜頭品頂戴光緒十二年遷順天府府尹十三年調宗人府府丞十四年補都察院左副都御史引疾歸其政績曰公之佐丁文誠

治河也親駐侯家林工次晝夜履行河干指示機宜未
及浹旬大工告嚴節省帑金百數十萬其官山東也當
兵燹之後又困河患民不聊生公務休養生息在任四
年困者以蘇瘠者以腴及官畿輔如在山東時以歲之
薦饑也爲籌振捐以海之多盜也爲嚴緝捕法越搆釁
軍務方殷畿南之地兵差絡繹創設官車局以紓民力
士卒飽騰間間安堵尤善政也其 恩遇曰公在內廷
請脈處方悉稱 上意 皇太后嘗諭諸醫曰汝等謂
子可安養乎治天下誠不易任大責重曷敢少自暇逸
薛福辰讀書人當知此意蓋知公深矣通永道駐通州

距京師近時蒙 徵召 賁懷渥拜大京兆 召對

便殿 諭曰卿非但能醫病實醫國之才也 賜御筆

職業脩明匾額又 賜御製一聯云敬謹身修葵向日

光明心事月當天及以副憲告歸 諭令盡心調養並

賜茯苓 命御醫診視頒行 上賜御筆福壽字及

歲歲平安四字直幅 皇太后又賜一聯云人游霽月

光風表家在廉泉讓水間公敬謹奉歸 天章爛然照

耀鄉里逮遺疏入照一品例 賜卹資帑金治其喪皆

異數也其行誼曰公自幼孝於親友於羣弟及官工部

聲望大起而公以遠離二親思慕不已乞假歸省既省

太夫人於里中又至湖南省其父其父潯州君由安福
移新甯以守城功擢知府拜潯州之命未赴而卒公奉
喪由賊中歸將謀窺岁而江南大營潰常州陷顧太夫
人率家人北渡江而留公與弟副憲君治葬事亂離之
中治葬如禮後僧弟副憲君謁曾文正公於皖陳恢復
江南之策文正大悅然公以老母在且諸弟未成立乃
留弟副憲君於營而自歸養母教諸弟李文忠勦擒賊
強公以俱捻平卽歸後感丁文誠知遇始出而用世非
其初意矣其學術曰公七歲時下筆爲文已驚其長老
父潯州君故雄於文其會試行卷海內傳誦焉君承其

家學故一出試卽以第二人舉京兆京兆第二人世所謂南元也公不以科名自滿致力經世之學博習經史旁通諸子百家又兼究素問靈樞之說其精醫由此也後遂蒙非僅醫病實能醫國之褒可謂不負所學矣公雖文臣少負膽略當葬父之後將赴江北猝爲賊所得公膚色不撓侃侃辨論賊不能測竟縱之去嗚呼亦奇士哉所著青萍閣文集又有風勞腋隔四種醫書官宗人府府丞時以宗卿事簡擬寫定成書而竟不果世以爲惜其生卒曰公生於道光十二年三月九日卒於光緒十五年七月二日年五十有八是年冬某月某甲

子葬漆塘之新阡元配王繼配樊又繼配竇並封一品
夫人丈夫子四邦彥出爲從兄後襲雲騎尉世職邦襄
蔭生官安徽合肥縣知縣邦餘由刑部主事官浙江知
府邦藩三品銜候選知府女子子三次女早卒長適何
剛德三適李經湘孫八人育麒育麟育虎育龍育驥育
彪育楚育藍孫女四其銘曰

仕有內外輕重分焉時而重外則詞臣請郡時而重內
則班生登仙旣區分乎內外遂互視若天淵公則不然
合而爲一在外則坐擁平旌麾在外則周旋平溫室故
輿前有洋溢之民謠而室內有輝煌之御筆以外臣

而內直惟公才之孔長在聖門爲政事在漢代爲循良
又不遺乎曲藝擅妙技於岐黃通醫病於醫國荷天
語之褒揚千載而下想其風度漆塘之阡拜公之墓宰
樹猶新邱壟如故讀我銘詞尙有餘慕

故吏部左侍郎許公神道碑

故吏部左侍郎許公之葬也余旣以文銘其幽宮矣功
令三品以上大員墓必有碑碑必有文其孤又以爲請
夫墓銘藏於幽者也而墓碑則表於顯者也將使後之
人過其墓讀其碑有以考見其人則宜書其大者君之
大節卓卓可傳請舉其崖略以昭示來茲公諱景澄字

竹筠浙江嘉興人許氏曾祖溶祖國楨本生祖廷梧父丙煊皆以公官贈資政大夫公年十五入縣學同治六年中式舉人七年成進士改庶吉士散館授編修充光緒元年順天鄉試同考官五年四川鄉試副考官九年升侍講十年充出使法德義和奧等國大臣十六年又充出使俄德奧和等國大臣十七年升太僕寺少卿轉通政司副使十八年升光祿寺卿十九年升內閣學士二十二年升工部右侍郎二十三年署禮部右侍郎充總理各國事務大臣調補吏部右侍郎轉左侍郎此公出處之大略也公之使法德義和奧也訂購鐵甲船二

穹甲快船三親詣船廠考求船制公著有外國師船表
十二卷其時作也又上言大沽口宜設鐵甲礮船膠州
灣宜爲海軍屯埠時論韙之其使俄德奧和也以俄之
獵騎時闌入我帕木耳界移書禁絕之又議定帕界援
舊議以烏仔別里山爲界俄則欲以薩雷闊勒爲界相
持三載公不爲奪界雖未定然俄謀息矣公駐俄垂六
年請受代不許又以俄德兩大國交涉事繁宜分兩使
二十二年卽以公出使德國從公議也適俄人欲開通
黑龍江吉林火車鐵路以直達海參崴託爲商辦設立
公司並請中國亦以銀五百萬入股爰命公爲公司

總辦凡公司例得之費公悉咨存總理衙門不以入己而路綫所經有溢而南者必力阻之且與俄約運料之船彼此稽查毋使漏稅俄人皆曲從焉事竣赴德又因俄人租我旅順口 命公仍還俄定議議定而公請病假還原籍溯公自出使以來前後十餘年奔走於火車汽船之上折衝於電傳筆譯之中不辭勞勩不避艱險內以崇 國體外以輯邦交古稱膚使公無愧矣此公奉使之大略也既還朝入譯署天下想望風采謂久勞於外行且大用而庚子之變作庚子爲光緒二十六年先是山東有亂民千百爲輩練習拳勇假託鬼神以扶

清滅洋爲名東撫毓賢信之言於朝貴皆爲熒惑而端
邸及剛毅崇奉尤甚招入京師設立壇場橫行廛市狙
擊使臣環攻使館公知大禍將作力言邪術不可恃外
勢不可敗不聽已而兵輪集於大沽聯軍逼於近郊事
益急言益切端剛等嫉之乃用李秉衡言非殺主和者
不可以戰公遂於是年七月壬寅與太常寺卿袁公同
及於難越十七日丙辰兵部尙書徐公亦不免焉袁與
徐皆公同志也半月之間駢戮大臣悉出權姦不由廷
議天地晦冥人情恒懼而禍亂成矣及至和議告成
大駕回鑾當時首禍之人皆膺顯戮乃始追念公等

詔雪其寃復還原職於是三公之名洋溢於天下翕然有三忠之目靈輿南還士大夫無識不識皆往助執紼祭奠成市哀輓盈途所謂萬代瞻仰在此一舉者此公之大節也嗚呼偉矣公卒年五十有六元配沈繼配高先公卒生四子皆殤以從子鼎鈞嗣 特用直隸州知州以公故也公事蹟在史館聲名動蠻貊所著奏議等風行海內無俟贅言謹舉其大者文於石繫以銘銘曰公起詞苑雅擅使才手持英蕩足徧埏垓昔公孫揮周知四國公久駐俄而再至德萬國情實公具知之虞虢胥齒齊秦雄雌亂之初萌公曰大誤誰秉國成迷而不

悟亂之旣成歸咎於公謂是和議梗我戰功曾幾何時
是非大白三忠之名赫然史策復爾朱紱焚爾丹書彼
哉戎首今竟何如一日千秋死而不死 帝憫尸臣人
尊虜使 主聖臣直身沒名存敬以此義表示墓門

襟文六編補遺卷六

德清俞樾

故四川總督劉公墓志銘

光緒三十二年秋七月壬戌故四川總督劉公卒於家
兩江總督安徽巡撫合詞以聞 天子憫焉以公學問
優長戰功卓著任事勇直持躬廉介 命復公故官視
總督例 賜卹生平功績宣付史館嗚呼公以罷歸林
下之人節終恩禮優渥至此其所以上契 聖心者必
有在矣余固不足以知公然故部民也又以同館之誼
相交者三十餘年於其葬也諸子具狀請銘余奚辭焉

按狀公諱秉璋字仲良劉氏明初自江西遷安徽廬江
遂爲廬江人明季又避寇亂遷居三河鎮曾祖光祖大
德本生祖大綵父世家並以公貴 贈如其官公自少
卽潛究古今盛衰治亂之原弱冠徒步游京師所過山
川形勢津梁險易皆心識之李文忠父侍御君見而歎
曰命世才也文忠亦深交於公咸豐元年中式順天
恩科舉人出參張文毅軍論功議叙知縣十年成進士
改庶吉士散館授編修時曾文正開府安慶一見公大
器之識其名於求闕齋日記李文忠將之滬創設淮軍
公實贊成之同治元年文忠至滬 奏調公來軍疏言

劉某沈毅明決器識宏深與臣爲道義交請飭赴臣
軍報可時文忠用洋將戈登治常勝軍而洋軍剽悍不
可制公善馭之故所至輒有功攻克福山解常熟圍進
駐太倉於是大軍無後顧憂專注蘇州蘇平規浙公募
六千人自爲一軍轉戰而前大破賊於嘉善賊來援者
數萬又大破之進攻張涇匯其地爲要衝賊守甚嚴公
督戰礮子中股裹創力戰卒毀其壘他處守賊皆不戰
而降乃會同程忠烈之兵直薄嘉興城公率所部登東
門焚其火藥庫諸軍乘之遂克嘉興有詔賞戴花翎
公先已由編修遷侍講至是累遷至侍講學士當時以

詞臣從事戎行李文忠外公一人而已東南肅清曾文
正李文忠先後奉 旨勦擒公皆從焉擒流竄無定公

先倡扼河而守之議及賊渡河又倡反守運河之議賊
勢遂日以蹙然數年間與賊馳逐於鄒魯皖豫淮徐湘
楚閒大小凡數十戰擒首任柱賴文洸張總愚會於豫
之石固寨公敗之禹城敗之灣店敗之呂城賊不得復
合張走秦是爲西擒任及賴回走山東是爲東擒兩擒
驛騷者數載而東擒卒滅於公當東擒之走皖也皖境
空虛公疾馳百數十里繞出賊前扼之宿松擒患不及
皖者公之力也賊自維河復入山東公追擊之於肥城

賊沿運河南下犯清淮公追擊之於張橋又及之於楊州之東北灣擒賴文洸時任柱已前死而東擒平矣公在軍累授江蘇按察使山東布政使皆未赴及擒平丁外艱十一年服闋入 覲授江西布政使光緒元年升江西巡撫以母年高請終養不允四年再請從之以母胡太夫人五世同堂 賜御書匾額六年 上欲破例用公 詔陸見有時事艱難毋稍拘泥之 諭公力辭不起其疏稿天下傳誦焉是歲敘江西籌辦甘餉功賞頭品頂戴八年養親事畢拜浙江巡撫之 命十年法人入寇公於海岸築長牆縣亘二三十里時張旗鼓

以爲疑兵於海口釘椿木又買海船數十載石沈之以
彌其隙其外則置水雷瀕海口岸亦埋地雷及法船入
鰲門守將吳杰發巨礮擊沈其二船又駛入虎蹲山一
礮中其煙筒一礮中其桅又以小船潛犯南岸連擊之
所傷甚多遂敗去不復至後閩諜偵知法大將孤拔將
軍迷祿皆死於是役云當是時各行省皆戒嚴如奉天
如直隸如閩如粵如滇如臺灣並有督辦之重臣部撥
之巨餉浙江無之而守禦完固敵不能乘論者謂中外
交涉以來所未有也及事平部議加八旗兵餉公疏言
今海患方殷而海軍未立宜竭天下之力先治海軍以

禦外侮俟海軍旣立然後徐圖八旗生計應如何安插
疏通請 飭王大臣從長計議疏入未及行及中日之
戰海軍不足於用論者皆服公先見焉十二年升四川
總督川境遼闊內多亂黨外接番夷素稱難治公督蜀
八年不輕發大衆如萬縣如茂州如秀山皆有叛者厥
勢甚張公處置得宜不勞而定如大小涼山如拉布浪
如瞻對各夷越界來犯公檄諸鎮以趙營平屯田法困
之皆俯首聽命十一年恭逢 皇太后六旬萬壽加太
子少保銜 賜御書長壽字福壽字及如意蟒袍等件
上意眷注良厚而公以老病已 六疏乞休至是又申

前請 上知其誠允之未受代教案起公治外事皆務
守經先是重慶有教民羅元義殺斃平民十餘人公捕
得立斬之英國商輪船欲入川江公曰如民船撞損何
執不許稅務司赫德欲加抽土釐公曰釐重價昂民皆
食洋煙矣又不許蜀人曠洋商請開礦公曰山有礦猶
山有木不得占山採木豈得越山開礦又不許外人銜
公久矣是歲成都省城民教大鬩焚毀教堂十餘所有
司逮問則皆極口詆毀教堂教士請削去之公曰事虛
實誠未可知覆訊則可改供則不可及保甲局道員周
某出示安民語又侵教士教士益憤執以達其國公使

欲甘心於公 朝廷知公守正不阿重開邊釁遂罷公
官或勸公諉罪於周公不可曰如 國體何公既罷歸
不事生產惟嗜讀書手不釋卷暇則與友人歌詠爲樂
所著自奏議尺牘詩文集各如千卷外尤長於方輿之
學舉平時所經歷者證以古事筆之於書又以廬江亂
後學務荒廢與同志創建三樂堂以興起後進家居十
餘年孜孜於此幾自忘其身經戎馬位至封疆矣然
朝廷念公不衰二十七年有 詔起公以舊傷發不能
赴蓋自張涇匯受傷後時劇時差又以厯膺艱巨心力
交困已非一日幸善自調攝故未爲害今年四月十八

日爲公入十生辰猶讌飲如常俄患脾泄變而成痢醫藥罔效遂至不起嗚呼方今內憂外患猶未救平天子方聽鼓鼙而思將帥而舊臣宿將凋零殆盡宜朝廷之眷念勲臣有加無已也最公一生治兵不欲歐吾兵臨危地故無赫赫功而乘機進取恒在諸將先公居官以安民爲主不便於民者雖內違廷議外犯敵怒不爲也嘗謂欲利國必無損民在江西追出積欠百餘萬皆州縣交代未清者非取於民也在浙江廉得州縣因豁免恩冒將征而未解者混入民欠項內稽核得數十萬亦非取於民也浙中防務急不能不籌餉事平則

一切權宜之法立罷川省有因江防海防而增加鹽釐者亦議停止卽部臣倡息借民財之策公亦疏言其不可又因蜀人開礦事詳陳礦弊嚴定礦律所言雖不盡用老成之見竄乎遠矣其所識拔者如吳杰錢玉興後皆知名吳武壯公長慶尤其著者在四川參革道員何應鐘後應鐘入都見李文忠極言公治蜀之善文忠比之奪駢邑無怨言非公之盛德能如是乎公娶程氏贈夫人側室黃以子貴 封太夫人初無子以弟之子爲子曰貽孫同治十二年拔貢生後舉丈夫子五體乾江蘇補用道體仁光緒二十三年舉人分省補用知府

體信亦分省補用知府體智戶部郎中體道分部行走
郎中出爲公叔父諱友家者後女子子二合肥李經方
嘉定徐廸祥其壻也孫十寅生潤生濟生滋生樾生灝
生寶生俊生宸生漢生孫女十有二某年月甲子諸子
奉公之喪葬於某原銘曰

起家詞苑投筆從戎李文忠外惟公與同東南大定戰
事未終皖豫湘楚屢奏膚功始撫豫章繼臨浙水軍府
甫開海氛斯起環顧鄰疆波盪未已吾浙晏然惟公是
倚由浙而蜀雄鎮三巴微盧彭濮至於流沙撫綏雕劫
蕩滌回邪民之父母 國之爪牙中朝有人外人所忌

簪紱拋榮林泉怡志疆事是非付之公議 帝眷公忠
始終勿替電波已謝雨露仍濃 璽書褒美卹典優崇
大命有止令名無窮刻銘示後用勵匪躬
孫君妻汪宜人墓志銘

宜人姓汪氏浙江秀水人乾隆四十五年一甲一名進
士名如洋海內稱雲壑先生者其曾祖也十歲喪父執
禮如成人粵寇陷嘉興汪氏所居稍僻寇未至避寇者
麕至出平時鍼術所積錢易粟佐其母飢餓者俄寇入
舉刃斫其母宜人格以右手三指皆傷血漉漉勿顧也
負母出走寇追及之寘母河干踊而入水寇遂去宜人

幸不死若有掖之登岸者遂與母俱免然無所得食賴
宜人懷有棗脯以延數日之命皆歎宜人之智也杭州
孫君仁甫亦避亂未中適與汪氏同居邱家堦同治二
年浙西平孫君欲歸而其婦朱宜人先卒其母朱太宜
人曰亂定而歸家室殆如創造汝內助無人如中饋何
聞汪氏女賢吾爲汝聘之於是宜人始歸於孫年二十
矣孫故杭右族乾隆中開四庫館浙人進書獨多 頌
賜佩文韻府者三家孫氏其一也杭有大舉如火藥局
築垣墻以備火患貢院置鉛笕以便水漿孫君皆躬與
其事而宜人皆陰助之內言不出無得而稱焉惟於同

族無後者之墓悉爲修治其未窆之柩一律瘞埋則實
皆宜人撤環瑱助成之蓋鑒於寇氛所至邱隴平夷棺
槨煨燼故力贊孫君成此舉也此又宜人之仁也歲時
祭祀備物惟謹事姑疾抑按搔摩夕不交睫宜人母戴
媪煢獨無依依孺人以終事之如在室孫君初娶朱宜
人其父少廉君猶在老無子家中落宜人曰朱宜人猶
吾姊也其父猶吾父也迎養於家少廉君病湯藥必躬
視之及卒其家積九棺未葬所嗣子曰文彬宜人出資
畀文彬爲營葬而文彬又卒宜人歎曰又增其一矣益
其資使藏事文彬之子曰鴻勳召之來學越三年補博

士弟子員宜人喜曰可以慰朱氏姊矣教其子若女極嚴故諸女皆嫻翰墨工刺繡而其子峻字康侯亦以文學有聞於時孫君有女兒歸朱氏者夫亡挈其子來歸宜人與相處垂三十年無閒言孫君有族叔母年逾七十家貧甚嘗泣曰旦暮就木誰施吾棺乎宜人卽爲市美櫬俾親見之性極仁恕子峻嘗怒責一人宜人諭止之峻曰其情實難忍也宜人曰忍人之所不能忍斯爲能忍耳人以爲名言生平不喜華飾一器一物儲以備用不佞佛不茹素遇水旱癘疫必焚香默禱語人曰吾一婦人豈足迓天和特自警省耳幼通書史長益淹貫

有女弟子數人晚年猶不釋卷病中命取魏志晉書五行志明史列傳及歐陽行周集置卧所時一觀覽後目力不足命其女讀而聽之初病腫繼以氣促歸高氏龐氏兩女刺血書疏禱於神願減壽益母算竟無效光緒二十九年四月戊申卒於內寢年五十九子一人峻也杭州府學附貢生中書科中書候選訓導女三人新城洪錫承秀水高全棟仁和龐世松其壻也孫絳年齊年和年引年女孫四某年日月某甲子葬於某原峻以狀乞銘銘曰

媿媿宜人古之女士嫺習禮法貫通經史以相其夫以

教其子齒未六旬美流百世我銘其幽亦銘亦誅傳女
憲者儻取諸此

贈一品夫人陳母姜夫人墓志銘

贈光祿大夫陳公暨楊夫人之葬余旣銘其墓矣而公
長子夔麟三子夔龍又以書來告曰先生妣姜夫人不
附於先公之塋而別葬貴陽南門外之桃花原不志不
銘懼無以昭示後世用敢再具狀以請余受而讀之曰
賢母也是宜銘按狀夫人姓姜氏貴州清鎮縣人家世
務農不仕夫人年十八以禮接於贈公事贈公嚴事楊
夫人謹無閒言贈公雖歷宰大邑而門內仍如寒素

楊夫人持家一以勤儉爲主夫人佐之饔烹焉煩撙焉
皆躬親之無難色及贈公引疾去官寄居貴陽橐中裝
不及千金居無何耗其半贈公與楊夫人又相繼下世
諸子皆幼時江南兵亂未已欲歸不得欲留無資夫人
慨然曰慰亡撫存余之責也又何辭公之子三人麟龍
皆夫人出夔麒則王恭人出夫人視之如一延師於家
課之讀書而家無儲畜黔中又無可通有無朝夕糴殮
恒至不給或勸夫人曰盍使諸子棄學就賈乎夫人曰
陳氏固詩禮舊族今雖棲泊異鄉然吾已矢之泉下人
矣一息尙存斷不忍使廉吏子孫淪於駟儉課讀如故

而黔亂日益亟。幾火達會垣。城中斗米千錢。魚肉蔬菜。稱是夫人以紡績供先生饌。鷄鳴而興。丙夜未息。聞諸子讀書聲。則喜。偶輟讀。亦不嘿。呵但泣曰。爾曹負我於。是諸子皆勤。僇於學。卒以成名。麟也。入詞曹。龍也。領鄉薦。夫人猶及見之。然一身心力盡此矣。舊患咯血。時劇時瘥。光緒六年十一月癸酉卒。年五十有二。夫人律已嚴。御下寬。遇親故尤厚。故其卒也。三黨內外咸惜焉。溯自贈公之歿。夫人主持家政。教育諸孤。含辛茹苦者十有七年。父道母道以一人任之。陳氏在元初有諱詠之者。學於吳草廬。虞道園兩先生。稱名儒嗣後皆潛德不

耀至是而三子鵲然而起大顯於時夔麟見官直隸永定河道夔龍見官河南巡撫而夔麒亦以舉人官知縣具見贈公志中海內士大夫獲交於陳氏者咸曰陳氏之興姜夫人力也夫人生子二女子子一有孫八人孫女六人曾孫二人亦云盛矣夫報施者天道也表章者人事也夫人之賢烏可以不銘銘曰

有是母有是子子也才學而仕母也賢怙而恃心燭煌煌與月齊光表此令德永示凱式

浙江巡撫任公墓志銘

公諱道鎔字礪甫別字筱沅晚號寄鷗江蘇宜興人任

氏先賢任子不齊之後宋建炎初有諱慶源者由河南
偃師遷宜興至公二十一傳矣曾祖元瑋崇祀孝弟祠
祖樹文父烜乾隆五十九年舉人六十年進士官至直
隸通永道崇祀鄉賢祠曾祖妣余祖妣陳妣三皆徐氏
三代並 贈如公官生妣王 封一品太夫人公少而
孤王太夫人課之嚴公亦克自刻勵道光二十九年考
取拔貢生 廷試用教職選授奉賢縣訓導蘇撫趙公
知公才檄辦松郡軍需數月集款六十餘萬推保升知
縣咸豐七年選授湖北當陽縣其地故好訟公隨訊隨
結數載之後訟事遂稀會以軍興需餉奉檄就境內勸

募一示出二萬餘金巨欸立至驚問何速也父老曰公
平日無絲粟累民公有言敢不奉命其得民如此同治
元年調補江夏縣旋升補直隸順德府知府順德連年
亢旱民多思亂所屬南河縣尤甚捕其魁置之法一郡
肅然七年捻首張總愚北犯公扼之沙河賊十餘萬夜
渡漳河而至公揮衆邀擊身受矛傷不爲却士氣益奮
斃賊殆盡郡境以全 詔以道員用加鹽運使銜 賞
戴花翎郡有洺河界連二府一州歲久淤塞公牒商鄰
郡同時疏濬郡北有響水河亦並濶焉履行阡陌教民
浚井區田諸法使人至山東購買桑秧導以蠶織嗣是

歲比有秋有麥秀雙歧之瑞總督曾文正疏薦有通達治體端謹勤明之語及李文忠公繼督直隸亦薦公才可大用十年調知保定府公在順德八年郡人勒石以紀功德並有建立生祠者既至保定檢視案牘積壓甚多清釐積案數年不決者每以一言決之聞者驚爲神俄升授開歸陳許道以兵備兼河務是年秋汎中河以險告公飛騎親臨督率搶護風雨中隄岸岌岌公兀然不動竭四晝夜之力轉險爲夷往者遇有險工糜帑動至數十萬此役才二萬二千餘兩耳河督喬勤恪公以聞詔加布政使銜光緒元年卓異引見時恭忠親

王及文文忠沈文定皆在政府見之歎曰名下固無虛也及回豫 奏署河南按察使旋補授江西按察使入都 陞見蒙 召對 賞克食至江西卽署布政使以政事十六條考詢守令又以吉南諸郡水災捐施錢米脩築隄埝民胥賴焉迨履臬司本任見積案更甚於直隸事閱二十年官更八九任公詳請寬免限期刊發清訟章程不數月而舊案三千餘起皆結四年遷浙江布政使嚴覈釐捐杜絕中飽又清丈各屬荒田酌定客民規條因時制宜有造於浙者甚巨五年移藩直隸以王太夫人年高擬請終養李文忠手書敦勸乃已至京

召見敘籌協西餉功 賜頭品頂戴是時直隸有水災
公拯濟如在江西時又以江浙積穀章程頒行各屬使
遵行焉直隸州縣新故交替公私欸項延不結算公勒
限清結庫帑驟增二百餘萬七年升山東巡撫公入對
時以母老陳情 聖諭慰留 命奉母赴任有某鎮乘
公初至以苞苴嘗試不受某鎮慙懼僞求去卽爲 奏
請開缺百吏悚然莫敢干以私公裁汰冗兵撤換統領
向之羸兵皆爲勁旅泰山沂山間山路危險公派兵弁
開通行旅便焉連歲河決黃龍背又決桃園公方患腹
疾輿病駐工五旬之久大功乃蒇原估工料八十萬至

是實用二十六萬而忌者猶欲擴河事以齟齬公 上固不信也未幾調任浙江以前在藩司任內失察某翰林服闋日期牽連被議浙人惜之公遂卜宅姑蘇奉母家居有終焉之志十三年王太夫人卒既免喪曾忠襄疏言公魄力沈毅堪膺艱鉅有 旨徵召公辭不起二十一年奉 特旨 陛見諸鉅公咸勸曰 上意優隆不可不出矣公入都 上問歷官本末甚詳明年上元節 上御頤和園 賜廷臣宴公亦與焉宴畢又 賜乘船游園皆異數也時 廷議欲以河南河工歸豫撫兼理而移河督於濟甯專治山東河工遂 詔公署理

東河河道總督馳赴河南察核奏復已而公奏言如舊
便從之未幾拜眞除之命公故官開歸陳許道河工利
弊素所悉也力除積習裁汰公費往者歲修之款支用
有餘歸督署內銷公悉數奏明發還司庫一歲所餘輒
五萬餘兩在任六年則三十餘萬矣公而忘私此其一
端也旋奉 命與李文忠會勘山東河工公議開鐵門
關故道疏入報可二十六年入 覲於京師上 諭
以時局艱難全賴一二老臣公忠體國公感激泣下是
年拳匪事起公知不可恃力爭於豫撫不之省公乃於
河標之外創立三營協守省會豫境救平公之力也二

十七年調授浙江巡撫當北方拳釁之方熾也浙東民聞風而起遂有衢州戕殺外國教士之事公酌量情罪往復辨論大獄不興外人悅服又與外人訂定約章使後人有所依據他若建設學堂整飭軍伍下以蘇浙民積困上以副朝廷振新庶政之意雖撫浙止一載有餘規模宏遠矣公年已八十恒患脾洩加以頭眩不得已疏請開缺上方倚重未之允屢申前請然後得請而歸歸則仍寓吳中購汪氏廢園營爲別業觴詠其中精力固猶未衰也三十二年正月朔旦猶出謁客月旣望感微疾竟以不起是月壬辰卒於正寢年八十有四

發篋得遺疏稿蓋具之久矣殆能前知乎元配史繼配

吳 贈封皆一品夫人子八之駒湖南候補知府署常

德府知府爲伯兄諱陞尊者後之騶山西候補直隸州

知州之駿分部郎中補用知府之驊直隸候補道歷署

霸昌及津河道之驤德淵皆殤德餘德藩均道銜未仕

女二宜興徐致聰桃源尹彥釗其婿也孫八承弼光緒

二十三年舉人內閣中書承祐早卒承沆光緒二十八

年舉人二十九年進士兵部武庫司主事承濟兩浙候

補鹽大使承憲安徽候補直隸州知州承傑候選知州

承忠承焚俱幼孫女八曾孫七某年月甲子諸子葬公

於某原以樾輟知公具狀乞銘銘曰

金鷺山下玉女溪邊篤生偉人爲時大賢建牙山左齊
魯舊宇總理大河經營充豫繫惟吾浙褰帷再來屏藩
昔建幕府今開浙民謳公公曰歸矣綠野平泉黃髮兒
齒巫陽下召胡不少留薤石刻銘傳示千秋

陳女繡君墓志銘

光緒三十一年夏六月甲子河南巡撫陳公之女公子
曰繡君者卒於汴梁使署越十日電音達於吳下余兒
婦輩皆大詫歎曰是好女子資稟聰明性情和婉如何
不祿一至於斯余因憶其幼時從其母許夫人至吾右

台仙館余及見焉遽聞其逝亦爲靈然久之而陳君書來寄示其哭女詩五十篇並許夫人詩三十六篇且曰吾家寫遠不能歸葬秋涼暑退許夫人當挈其柩南歸卜葬西湖之旁君能以一言志其墓乎余讀蔡中郎集有童幼胡根碑以七歲孺子猶爲刊貞石勒銘况陳君之女已逮成人雖閨閣中無所表見然蔡中郎所謂柔和順美靡不備焉是固合銘例矣余又何辭謹按女諱昌紋繡君其字也陳氏貴州貴陽人生於京師其始生也陳君方官部曹甚貧貸於人乃粗具湯餅女既生而陳君官況日益饒衍親黨皆曰此女有福女故荏弱若

不勝衣者而性特慧如音律如丹青如奕棋一見卽能
效之效之卽無不工母憐其弱不使讀書而女甚好之
遂粗通經史大義歲在庚子洋兵闌入禁城 兩宮

西狩陳君時由署順天府尹調署太僕寺卿未出解聞
變慨然曰吾故守土官分宜死將仰藥女泣諫曰 國
家恩澤在人雖外侮突來如飄風驟雨不能終日大人
爲 國宣力之日方長毋遽引決也許夫人時藏利刃
於懷每思自剄女亦止之未逾年 大駕回鑾 皇路

清平而陳君官位亦以大起人皆服女之先見焉陳君
由漕督遷豫撫舉家從之官境遇耄熾而女與二親言

每及時局艱危輒爲不樂且曰安得早卸仔肩乎嗚呼是有漆室女之風矣陳君未有子以兄子爲子女友愛之若同產然遇婢媼亦和靄無疾言每歲端陽手製艾虎分貽親串咸歎其巧今年猶扶病爲之蓋女初無大病爲藥誤也年纔十有七此余廢醫論所爲作矣然女年十二歲時猶在京師有日者推算行年曰十六歲時慎無至汴梁至則大不利及許夫人挈女隨宦中州女年適十六歲殆亦數之不可違者乎女病革時時作隱語不甚可辨如云碧水小橋又云蓮花五色殆已游仙境矣陳君又夢其戴紫金花冠手執玉簫行甚速非復

女子態余寄慰陳君書曰白太傅之金鑾或轉世而爲
謝太傅之玉樹此雖讖言異日安知不竟爲實事乎陳
君與夫人亦可破涕而一笑矣年月甲子葬西湖之某
原銘曰

於惟繡君如蘭斯馨明敏之質如玉如英宜膺福祚
佩光榮胡繁華之甫韡未嚴霜而先零雖或登乎仙境
將何慰乎親庭冀形亡而神在聊託辭乎斯銘

吏部左侍郎孫公墓表

道光三十年會試天下士兵部左侍郎鹽山孫公充副
總裁官而樞卽於是科成進士嗣是隸弟子之籍者至

今五十七年而公歸道山亦已二十一年矣今年夏樾
病卧吳中公之孫展雲太守適代理蘇州府事狀公事
實就樾而乞銘樾以八十六歲老門生幸而未死義固
不得而辭然墓木已拱銘幽無及矣無已請表於其墓
惟墓表之體但當舉其大者一二端而公生平名位之
盛亦自有不可得而略者樾因小變其例先詳載公一
生事實以盡門下士後死者之責而後舉其大者以告
天下後世謹按狀公諱葆元字蓮塘直隸鹽山縣人孫
氏明永樂閒始自玉山遷鹽山所居在城東曰趙毛陶
村五百餘年來科第相望遂爲津郡望族公幼事親以

孝聞承其父遇安公之教刻勵於學嘉慶二十五年應
府院試皆第一遂入縣學旋補餽額道光八年舉於鄉
明年聯捷成進士改庶吉士派習 國書充 武英殿
協修十三年散館授翰林院檢討是年遇安公卒公以
在京不及親含歛深自引疚服闋擬在家奉母不復出
母楊太夫人以大義責之始回京供職充 國史館協
修纂修 武英殿纂修總纂充十八年會試同考官京
曹清苦仍以教授爲業視諸生時無異也二十年補應
大考以雙燕賦受知 宣宗成皇帝附以二等異
數也歷充教習庶吉士 文淵閣校理 國史館總纂

至二十二年升國子監司業由中允洗馬遷侍講充日
講起居注官 咸安宮總裁浸通顯矣二十三年又以
大考高等升右春坊右庶子累遷翰林院侍講侍讀學
士詹事府事於是 眷注益隆二十六年詹充福建鄉
試正考官旋 簡放江西學政二十九年爲考選拔貢
之歲江西拔貢卷費重於他省每納一卷需銀六十兩
寒士深以爲苦公一律蠲除之相沿至今皆公之遺惠
也是時公已由閣學升兵部右侍郎轉左侍郎三十年
充會試總裁充武會試知貢舉咸豐元年 覃恩蔭一
子尙絳以主事用分刑部而公以楊太夫人年逾八旬

陳情歸養許之明年直隸大無輸錢以賑又明年楊太夫人棄養而粵賊已由金陵北犯畿輔戒嚴 命公以在籍大員充團練大臣畿東倚賴焉服闋回 朝補禮部左侍郎八年 簡放江蘇學政九年借浙江貢院舉行江南 恩科鄉試充監臨官旋奉 命辦理清江浦善後事宜移駐淮安捐助廉俸銀八千兩 詔移獎其子世杰以六部郎中補用又遵部議量捐銀一千兩 詔加四級同治元年 覃恩蔭其孫毓駿以主事用分戶部名位優崇門庭鼎盛朝列榮之俄調吏部右侍郎轉左侍郎署兵部尚書屢充 殿廷考試閱卷大臣

聖眷固未替也三年 命以原品致仕 上意或憫其
老乎公自楊太夫人卒久有歸老之意受 恩重未敢
言至是始遂其初志矣歸里後主邑中書院講席修葺
志乘周濟貧乏鄉黨稱之後因兵亂毀其家公亦夷然
不以措意也夫人潘氏貴而能儉老而能勤子尙端尙
綏皆官至知府世杰官郎中世振世棻皆有雋才孫十
二人毓駿毓驥均官知府毓驥卽展雲太守也公之福
壽多男近代公卿中罕有倫比生於嘉慶六年三月甲
辰歿於光緒十二年三月己未年八十有五最公一生
起家詞林累司文柄銓登卿貳攝官大司馬可謂極明

良之盛遭遇之隆矣然其始敷歷清華以文字供奉而
已其後廻翔九列於六部歷其四然部中章奏皆與同
列會銜雖有嘉猷碩畫不自表襮人亦不得而知惟公
視學江蘇也樾亦寓蘇其時有借浙闡鄉試之議公與
樾言之深不以爲然及今讀行狀知公當日固有密疏
力阻也嗚呼是時蘇杭猶完善爲財賦所自出金陵長
圍已合城中之賊釜中魚耳及借浙闡而皖士之就試
者大率由泗安廣德以達杭州而賊卽尾乎其後杭之
失守實由此道而來自是蹂躪千餘里縣歷五六年雖
大憝終於授首而東南元氣所傷已多中原積弱至今

不振日復一日而外患乘之使當日能從公言何至於此惟彼哲人瞻言百里公之謂矣樾於公之出處本末既備書之而特舉此一事以表告後世後之君子過是墓讀是文其亦有感於斯言夫

程薌滋像贊

君諱桂錡字薌滋程氏安徽黟縣人性孝友貌魁梧初奉父命服賈後以有膂力又命習武咸豐十一年中式武舉人粵賊之亂君勾衆保鄉里張文毅公奇之欲授以官不受君雖武士而喜讀書與其兄孝廉桂鍾辨論古今孝廉往往爲所屈時諺謂文舉不如武舉云生平

好拯危濟急忍人所不能忍爲人所不敢爲亦奇士也
子三人皆邑諸生次子肇珏以君圖象乞爲之贊冀見
名氏於吾集中余憫而許之贊曰

列強環伺首重在商君始服賈實精且良時方多故國
乃尙武君以武舉魁其儕伍雖以武舉郁郁彬彬坐擁
圖史尙論古人業雖在商其行則士積德於躬稱善鄉
里往年寇警力衛梓桑招之戎幕惟文毅張君笑不顧
守我邱壘天昌其家荀龍薛鳳仲子肇珏涕泗陳言願
得一語以光九原哲人雖亡圖像斯在我作贊詞垂示
千載

國朝蘇州府長元吳科第譜序

進士之有題名記自唐始也唐裴庭裕東觀奏記云大中十年鄭顥知舉上宣索科名記顥表上云自武德以後進士姓名皆私家記錄臣委祠部員外趙璘採訪諸家撰成十二卷宜付史館自今放榜後並寫及第人姓名進內仍仰所司逐年編次然則唐進士題名由所司逐年編次其重如此宜有唐一代進士之科得人最盛也國朝自定鼎以來卽以進士舉人登進天下士至今二百數十年人材輩出其磊落軒天地者皆出其中可之盛矣鄉會試題名錄皆經奏御視唐制尤密然

歷年既久鄉黨中轉有不能舉其名氏者甚非所以重
科名存者舊也吾湖之有科第表蓋創始於乾隆癸丑
戴服塘先生今庚辰公所還科增修有進士表有舉人
表有拔貢表而鴻博特科及輟軒榮遇則冠之卷首其
例頗爲詳備浙江十一府惟吾湖有是前輩采輯之功
不可沒矣蘇州爲東南大行省人材之富科名之盛甲
於海內而此錄則未之有聞元和陸九芝先生引以爲
憾爰集太學題名碑館選錄諸書參之志乘證以見聞
自順治乙酉至光緒癸未得進士舉人若而人都爲一
編名曰科第譜所載皆長洲元和吳縣附郭三首縣之

人其外六縣則稽考未周姑缺焉先生旣歸道山其哲嗣鳳石尙書又踵成之至光緒三十年甲辰而止於是三邑之士凡科第起家者備載無遺矣承尙書雅意問序於余余取而讀之與吾湖科第表大略相同而兼載武科則爲吾湖所不及先生創始之心尙書繼承之力所以景仰前修獎掖後進意深遠矣自科舉廢而科舉中人日益稀少亦日益寶貴詩不云乎雖無老成尙有典型後之讀是譜者其亦有感於斯言夫

新修寒山寺記

筱石中丞之撫中州也於節署得八景焉其八曰蕭寺

鐘聲中丞賦詩云宦味與禪悅喧寂有殊致夜半聞鐘聲如在寒山寺詩境清越寓意深遠一時賓從皆吟賞不置其時在乙巳之冬及明年正月遂拜移節江蘇之命中丞喟然曰浮生如寄宦跡如蓬吾前詩其爲之兆乎爰於三月下旬蒞止三吳下車伊始興教勸學整軍經武日不暇給未遑一問寒山之勝也偶因校閱營伍稅駕郊坰問其地曰楓橋也問寒山寺焉在曰近在咫尺乃與衆往觀入其大門門庑且隘登其大殿榱桷粗存達觀於其左右則荒葛崩榛中惟燕葵兔麥而已文待詔所書唐張繼詩舊刻石寺中可辨者僅數字唐

六如寒山寺記亦漫漶過半中丞歎曰名勝之地荒蕪至此官斯土者與有責焉吾曩者遠在大梁緬懷茲勝形之歌詠今臨其地其能忽然乎乃與寮屬共謀修葺自方伯以下不謀而同辭僉曰美哉斯舉乎各捐俸廉贊成其事爰卜日鳩工展拓其門閭使臨大路由門而進折而南行構堂三楹由堂而進東西之屋各三東屋宏敞賓朋之所燕息也西屋稍稠則凡寺中舊碑咸植於是以致文待詔所書張懿孫詩今日殘缺屬余補書而重刻焉堂之西尚有隙地乃構重屋是曰鐘樓鑄銅爲鐘懸之其上以存古蹟經始於光緒三十二年九月不

兩月而告成中丞自捐廉俸以爲之倡自方伯廉訪觀
察太守及長洲元和吳縣三大令咸醵資以飲之都凡
用洋錢二千六百董理是役者權知元和縣寶君鎮山
也余往年視學中州辱有文字之契故與余相習因繪
圖具說述中丞之命求記於余考寒山寺創建於梁天
監時舊名妙利普明塔院以寒山子曾居此寺故卽以
爲名吳中寺院不下千百區而寒山寺以懿孫一詩其
名獨著此詩不獨膾炙於中國抑且傳誦於東瀛余寓
吳久凡日本文墨之士咸造廬來見見則往往言及寒
山寺且言其國三尺之童無不能誦是詩者乃寒山寺

竟蕪穢不治使人發勝地不常之歎何以存此邦之名蹟而動遠人之欣慕哉然則中丞之修葺此寺其用意深矣若惟是感朕光之不虛喜觴詠之有寄猶非中丞雅意也余老矣不獲從諸君子後其落其成輒紀本末述年月以爲斯記自方伯以下各出錢若干用漢碑之例具刻碑陰故不及焉余所書張懿孫詩遠不及衡山舊刻而此記則尙能窺見中丞之意或視六如居士舊記所見者較大乎

蒼培孫君家傳

君諱文徵字蒼培孫氏江蘇陽湖八父諱某字金洪母

承氏生二子長文典君其仲也幼讀書以貧故去而學
賈雖居闖闖閒而無機械之心持己端重待人寬恕無
閒言咸豐十年粵賊陷常州金洪君遇賊不屈死君茹
痛飲泣躬營窀穸之事事已奉其母避寇於江北文典
爲兵阻不克偕行仍歸其居未幾物故君在江北聞耗
潛歸爲營葬焉當是時東南大亂世家巨室灰滅無遺
死者枕藉於道子不克葬其父弟不克葬其兄比比皆
是而君於傾側擾攘之中父兄兩喪皆克成葬其天性
固過人遠甚而其材智亦有不可及者矣同治三年官
軍收復常州君奉母歸復治故業朝夜不倦貲產愈饒

潔膳羞備甘旨以奉其母母病湯藥必躬進不解衣而
息者旬有餘日及母卒喪葬皆以禮奉其寡嫂益虔撫
兄之孤子不異己出數十年如一日有父執李某貧乏
無以自存爲謀生計傾囊助之生平嗇於自奉而三黨
中以緩急告者無不諾鄉里義舉知無不爲或有爭競
之事君一言平其曲直無不悅服於是遠近咸推曰長
者長者光緒十五年某月日卒於家年六十有一娶洪
氏北江先生從孫女也有賢德少時嘗割股療其母疾
不言於人人罕知者先君卒繼娶王氏子耀彬及一女
洪出也煥彬鉉彬皆王出女適洪慶葆則北江先生曾

孫矣耀彬因君每以廢讀爲憾故又棄賈而讀并親課其兩弟讀蓋成先志云

論曰孔子稱一邑必有忠信如君者非其人歟漢時長安市中有劉仲昭者經明行修屢以有道徵不赴而許邵亦嘗識樊子昭於鬻幘之肆嗚呼塵市之中大有人在正不必以棄書而賈爲君惜也